



Broj: 01/1-50-1-1-28/08  
Sarajevo, 24.1.2008.godine

## Z A P I S N I K

### 28. sjednice Ustavnopravne komisije

Sjednica je održana 24.1.2008., s početkom u 9 sati.

Sjednici su prisustvovali članovi Komisije: Šefik Džaferović, Lazar Prodanović, Halid Genjac, Drago Kalabić, Martin Raguž, Velimir Jukić i Momčilo Novaković.

Članovi Komisije Adem Huskić i Ekrem Ajanović opravdano su odsustvovali.

Osim članova Komisije, sjednici je prisustvovao predstavnik Ministarstva sigurnosti BiH Dragan Mektić.

Sjednici je prisustvovao i Nedžad Salman, stručni saradnik u Ustavnoj komisiji.

Predsjedavajući Komisije predložio je, a Komisija jednoglasno usvojila sljedeći

## D N E V N I R E D

1. Usvajanje Zapisnika 27. sjednice, održane 28.12.2007. i 4.1.2008.;
2. Usvajanje izvještaja o radu Ustavnopravne komisije za 2007. godinu (**razmatranje i usvajanje Izvještaja u skladu s članom 31. stav (2) Poslovnika Doma**);
3. Prijedlog zakona o izmjenama i dopunama Zakona o Službi za poslove sa strancima Bosne i Hercegovine, predlagač: Vijeće ministara BiH (**usaglašenost sa Ustavom BiH i pravnim sistemom, u skladu s članom 103. Poslovnika Doma**);
4. Prijedlog zakona o kretanju i boravku stranaca i azilu, predlagač: Vijeće ministara BiH (**Usaglašenost sa Ustavom BiH i pravnim sistemom, u skladu s članom 103. Poslovnika Doma**);
5. Ostala pitanja:
  - Zahtjev Ustavnog suda BiH za mišljenjem o Zahtjevu za ocjenu ustavnosti člana 11. stav (6) Zakona o finansiranju institucija BiH („Službeni glasnik BiH“, br. 61/04), podnosilac: predsjedavajući Predstavničkog doma PSBiH dr. Milorad Živković (**razmatranje zahtjeva u skladu s članom 41. stav (1) tačka g) Poslovnika Doma**);
  - Razmatranje zaključka Ustavnopravne komisije Doma naroda o održavanju zajedničke sjednice o nalaženju metoda efikasnijeg rješavanja zahtjeva za autentičnim tumačenjem;
  - Upoznavanje Komisije o Prijedlogu izmjena i dopuna Okvirnog zakona o visokom obrazovanju koji je podnijelo Sveučilište u Mostaru;

- Upoznavanje Komisije o primjedbama Asocijacije poslodavaca BiH i Samostalnih sindikata BiH na Prijedlog zakona o izmjenama i dopunama Zakona o upotrebi i zaštiti naziva Bosne i Hercegovine.

#### **Ad. 1. Usvajanje Zapisnika 27. sjednice, održane 28.12.2007. i 4.1.2008.**

S obzirom da nije bilo rasprave, Komisija je jednoglasno usvojila Zapisnik 27. sjednice.

#### **Ad. 2. Usvajanje izvještaja o radu Ustavnopravne komisije za 2007. godinu (razmatranje i usvajanje Izvještaja u skladu s članom 31. stav (2) Poslovnika Doma)**

S obzirom da nije bilo rasprave, Komisija je jednoglasno usvojila Izvještaj o radu Ustavnopravne komisije za 2007. godinu.

#### **Ad. 3. Prijedlog zakona o izmjenama i dopunama Zakona o Službi za poslove sa strancima Bosne i Hercegovine, predlagač: Vijeće ministara BiH (usaglašenost sa Ustavom BiH i pravnim sistemom, u skladu s članom 103. Poslovnika Doma)**

S obzirom da nije bilo rasprave o predloženom zakonu, Komisija je jednoglasno odlučila da:

- postoji valjan ustavnopravni osnov za donošenje Zakona;
- je Prijedlog zakona usklađen sa Ustavom BiH i pravnim sistemom.

#### **Ad.4. Prijedlog zakona o kretanju i boravku stranaca i azilu, predlagač: Vijeće ministara BiH (usaglašenost sa Ustavom BiH i pravnim sistemom, u skladu s članom 103. Poslovnika Doma)**

S obzirom da nije bilo rasprave o predloženom zakonu, Komisija je jednoglasno odlučila da:

- postoji valjan ustavnopravni osnov za donošenje Zakona;
- je Prijedlog zakona usklađen sa Ustavom BiH i pravnim sistemom.

#### **Ad.5. Ostala pitanja**

- **Zahtjev Ustavnog suda BiH za mišljenjem o Zahtjevu za ocjenu ustavnosti člana 11. stav (6) Zakona o finansiranju institucija BiH („Službeni glasnik BiH“, br. 61/04), podnosilac: predsjedavajući Predstavničkog doma PSBiH dr. Milorad Živković (razmatranje zahtjeva u skladu s članom 41. stav (1) tačka g) Poslovnika Doma)**

Predsjedavajući Komisije otvorio je raspravu u kojoj su učestvovali svi članovi Komisije. Šefik Džaferović istakao je da bi Ustavnopravna komisija o ovom zahtjevu trebalo da zauzme stav kao i u prethodnim slučajevima, odnosno da Ustavnopravna komisija ostaje na pozicijama zakona koji je usvojen u oba doma Parlamentarne skupštine BiH. Drago Kalabić smatra da se u ovom slučaju radi o specifičnom zahtjevu koji regulira jedno važno pitanje i koji bi trebalo podržati zato što postoje određene neusklađenosti člana 11. stav (6) Zakona o finansiranju institucija BiH i člana 8. stav (2) Ustava BiH.

Nakon rasprave, predsjedavajući je predložio da Komisija o ovom zahtjevu zauzme stav kao i u ranijim slučajevima, odnosno da ostaje na pozicijama usvojenog zakona.

Prijedlog, s jednim glasom „za“, tri glasa „protiv“ i dva „suzdržana“ glasa, nije prihvaćen.

Nakon toga, predsjedavajući je stavio na glasanje prijedlog da se podrži zahtjev za ocjenu ustavnosti člana 11. stav (6) Zakona o finansiranju institucija BiH, podnosica Milorada Živkovića.

Prijedlog je, s tri glasa „za“, jednim glasom „protiv“ i dva „suzdržana“ glasa, prihvaćen.

Predsjedavajući Komisije Šefik Džaferović tražio je da se izdvoji njegovo mišljenje smatrajući da Zahtjev ne treba podržati i da se konstatira da u trenutku glasanja nisu prisustvovala tri člana Komisije.

Nakon glasanja sjednici je pristupio i član Komisije Halid Genjac koji je također tražio da se i njegovo mišljenje izdvoji jer smatra da Ustavnopravna komisija slične zahtjeve ne treba ni podržati ni ne podržati, nego samo navesti činjenice u pogledu usvojenog zakona.

- **Razmatranje zaključka Ustavnopravne komisije Doma naroda o održavanju zajedničke sjednice o nalaženju metoda efikasnijeg rješavanja zahtjeva za autentičnim tumačenjem**

Komisija je primila na znanje zaključak Ustavnopravne komisije Doma naroda i jednoglasno podržala prijedlog da se u što skorije vrijeme, posredstvom sekretara ustavnopravnih komisija oba doma, održi zajednička sjednica radi nalaženja metoda efikasnijeg rješavanja zahtjeva za autentičnim tumačenjem. Momčilo Novaković istakao je da je također neophodno izvijestiti radnu grupu za poslovnik o rezultatima.

- **Upoznavanje Komisije o Prijedlogu izmjena i dopuna Okvirnog zakona o visokom obrazovanju koji je podnijelo Sveučilište u Mostaru**

Predsjedavajući je otvorio raspravu u kojoj su učestvovali : Momčilo Novaković, Martin Raguž, Velimir Jukić i Halid Genjac. Momčilo Novaković istakao je da smatra kako Kolegij Doma uopće nije trebao Prijedlog Sveučilišta u Mostaru da dostavi Ustavnoj komisiji nego svakom poslaniku. Velimir Jukić istakao je da u praksi nema onih očekivanih efekata Zakona te smatra da bi resorno ministarstvo trebalo da informira o provođenju Zakona. Martin Raguž smatra da bi se, uz ovo, trebalo komunicirati i s drugim univerzitetima kako bi se ispitalo provođenje Zakona.

Predsjedavajući je predložio, a Komisija jednoglasno primila na znanje Prijedlog izmjena i dopuna Okvirnog zakona o visokom obrazovanju koji je podnijelo Sveučilište u Mostaru.

Martin Raguž tražio je da se zapisnički konstatira kako smatra da su prijedlozi Sveučilišta u Mostaru opravdani te da od resornog ministarstva treba zahtijevati informiranje o provođenju Zakona i uporedo ući u proces sa izmjenama i dopunama Zakona.

- **Upoznavanje Komisije o primjedbama Asocijacije poslodavaca BiH i Samostalnih sindikata BiH na Prijedlog zakona o izmjenama i dopunama Zakona o upotrebi i zaštiti naziva Bosne i Hercegovine**

Predsjedavajući je predložio, a Komisija jednoglasno primila na znanje primjedbe Asocijacije poslodavaca BiH i Samostalnih sindikata BiH na Prijedlog zakona o izmjenama i dopunama Zakona o upotrebi i zaštiti naziva Bosne i Hercegovine.

Kako nije bilo drugih pitanja, predsjedavajući Komisije zaključio je sjednicu u 10, 30 sati.

**SEKRETAR KOMISIJE**  
Igor Bajić

**PREDSJEDAVALAČI KOMISIJE**  
Šefik Džaferović